



RESUMO DAS CLÁUSULAS QUE REGULAN O CONVENIO DE COLABORACIÓN ENTRE A CONSELLERÍA DE SANIDADE, O SERVIZO GALEGO DE SAÚDE E O ESTABLECEMENTO DE ÓPTICA QUE SE ADHIRA, PARA O DESENVOLVEMENTO DUN PROGRAMA DE PREVENCIÓN DOS PROBLEMAS VISUAIS.

Obxecto

Establecer as bases de cooperación entre o Servizo Galego de Saúde e o establecemento de óptica que se adhira para a prevención de problemas visuais e promoción da visión, en beneficio de todas as persoas usuarias do Sistema Sanitario Público de Galicia.

Actividades concretas conveniadas.

1. As persoas usuarias do Servizo Galego de Saúde, por iniciativa propia, poderán acudir ao establecemento de óptica a solicitar unha revisión en base ao establecido neste convenio.

2. O establecemento de óptica pode desenvolver as actividades seguintes:

- a) Serán beneficiarias as persoas usuarias do Servizo Galego de Saúde maiores de 5 anos.
- b) Para alcanzar os obxectivos do convenio, os establecementos de óptica adheridos ao convenio realizarán as seguintes actuacións:
 - 1º. Avaliación do estado refractivo/agudeza visual mediante probas optométricas.
 - 2º. Realización das seguintes probas complementarias:
 - Medición da reacción pupilar.
 - Medición da habilidade de fusión plana a través do test de Worth.
 - Cuantificación da integridade do campo visual correspondente á rexión macular mediante o test da Reixa de Amsler.
 - Proba da cor.
 - Transparencia de medios.
 - Proba de cover-test.
 - Motilidade ocular
- c) Calidade: o establecemento de óptica disporá de protocolos comúns, que seguirán as pautas indicadas no curso de formación, para a realización das



actividades suxeitas a este convenio, que poderán ser solicitados para a súa avaliación por parte da comisión mixta de seguimento. Ditos protocolos constarán, polo menos, dos seguintes apartados: as actividades a realizar, o equipo técnico necesario e o procedemento.

Xestión do acceso ás actividades conveniadas.

1. O establecemento de óptica debe identificarse como establecemento adherido ao convenio unicamente co cartel cun logo específico que identificará o programa “Coida os teus ollos”
2. As persoas usuarias solicitarán cita no establecemento de óptica que escollan.
3. O profesional óptico acreditado, do establecemento da óptica adherida, ao convenio poderá acceder ao documento do Programa “Coida os teus ollos” mediante o acceso ao sistema informático do Servizo Galego de Saúde e a identificación do paciente a través dos datos do TIS do usuario do Sergas.
4. A continuación, levaranse a cabo as actividades conveniadas e cumprimentará o documento do programa. Estes datos quedarán rexistrados de forma segura e confidencial na Historia Clínica Electrónica Galega, onde poderán ser consultados polos profesionais autorizados do Sistema Público de Saúde de Galicia.
5. Realizadas as actividades procedentes, o profesional óptico indicará ao paciente a necesidade de pedir cita co seu médico ou pediatra de Atención Primaria para a avaliación dos resultados.

Procedemento e criterios de acreditación

1. Os establecementos de óptica que desexen adherirse ao presente convenio deberán:
 - a) Dispor das oportunas autorizacións sanitarias, así como as súas renovacións preceptivas, de conformidade coa normativa vixente reguladora da autorización de centros, servizos e establecementos sanitarios.
 - b) Estar inscritos no Rexistro de centros, servizos e establecementos sanitarios de Galicia.
 - c) Ter, como mínimo, un profesional óptico-optometrista colexiado que teña realizado a xornada técnico-informativa, á que se alude deseguido.
2. Os profesionais ópticos-optometristas que o desexen poden participar na actividade formativa “Normalización dos procedementos para a prevención dos problemas vi-



suais”, para o cal se inscribirán no prazo que se estableza a tal efecto, a través do Servizo Galego de Saúde. Esta formación realizarase 2 veces ao ano.

No caso de que o profesional óptico-optometrista que queira inscribirse no curso xa estea traballando nun establecemento de óptica pero non se atope no cadro de profesionais dela, o titular do establecemento deberá actualizar o cadro de profesionais e os datos rexistrados, a través do seguinte enlace <https://www.sergas.es/A-nosa-organizacion/Rexistro-de-centros-servizos-e-establecementos-sanitarios-de-Galicia>.

Unha vez realizada a formación e cumpridos o resto de requisitos establecidos a tal efecto, certificarase a súa participación e figurará desde ese momento como profesional formado para levar a cabo as actividades conveniadas que se especifican na cláusula segunda.

Posteriormente a persoa titular do establecemento de óptica terá que incorporar o certificado de asistencia a formación de todas as persoas profesionais que traballen no establecemento.

3. O Servizo Galego de Saúde dará aos seus centros de atención primaria as instrucións necesarias para que os profesionais sanitarios coñezan e faciliten aos pacientes a realización das actividades conveniadas.

Causas de extinción do convenio

1. Ademais das causas de resolución establecidas no artigo 51 da Lei 40/2015, do 1 de outubro, constituirán causas de exclusión do establecemento de óptica as seguintes:

- a) A non presentación da comunicación ao Servizo Galego de Saúde da baixa do/a profesional óptico-optometrista formado para levar a cabo o convenio.
- b) A falta de comunicación dos datos de novos/as profesionais ópticos-optometristas que se incorporen, de conformidade coa normativa reguladora da autorización de centros, servizos e establecementos sanitarios.
- c) A existencia de condutas indebidas que inflúan na elección do establecemento de óptica polo paciente e beneficien particularmente a un ou varios establecementos.
- d) O incumprimento de calquera das cláusulas do presente Convenio.

2. A exclusión producirase por resolución motivada da persoa titular da Consellería de Sanidade, ou persoa na que delegue, previa audiencia ao establecemento atinxido.



Custos derivados da realización do programa.

1. A Consellería de Sanidade non realizará ningún pago ou compensación económica a favor do establecemento de óptica que asina o convenio pola realización das actividades indicadas neste.

Non se lles poderá cobrar aos pacientes do Servizo Galego de Saúde polas actividades realizadas indicadas no convenio.

2. A Consellería de Sanidade organizará dúas actividades formativas. Os custos derivados do financiamento da actividade formativa, así como doutras actividades formativas que se organicen durante o desenvolvemento do convenio serán financiadas pola Consellería de Sanidade.

Comisión de Seguimento

1. Créase unha Comisión de Seguimento do convenio que estará formada polos seguintes membros:

- a) Unha persoa en representación da Consellería de Sanidade, designada por esta.
- b) Unha persoa en representación do Servizo Galego de Saúde, designado por este.
- c) Unha persoa titulada en óptica-optometría e acreditada para realizar o convenio, en representación dos profesionais acreditados.
- d) Unha persoa en representación das persoas titulares dos establecementos de óptica adheridos ao convenio.

2. A Comisión de Seguimento terá como función principal garantir o adecuado desenvolvemento na aplicación do programa, así como a resolución de todas aquelas cuestións que se presenten en relación coa execución e interpretación do texto do convenio.

3. A Comisión de Seguimento definirá un plan formativo anual para o conxunto dos profesionais ópticos-optometristas dos establecementos adheridos que permita que se realicen dúas actividades formativas anuais. A organización da xornada e das actividades formativas, así como da súa acreditación serán realizadas pola Consellería de Sanidade.

4. A comisión reunirse como mínimo unha vez ao ano ou cando se estime necesario.



Vixencia

O presente convenio entrará en vigor o día da súa sinatura e terá unha vixencia de catro anos, podendo ser prorrogado por mutuo acordo das partes asinantes antes da data da súa finalización, sen que en ningún momento o período de vixencia poida superar o límite de oito anos establecido no artigo 49 da Lei 40/2015, do 1 de outubro, incluída a súa prórroga.

CARTEL IDENTIFICATIVO DE ESTABLECIMENTO ÓPTICO ADHERIDO AO CONVENIO “COIDA OS TEUS OLLOS”

